

晚晴簃詩匯

第十冊

晚晴簃詩匯卷二十二目錄

趙進美 十三首

彭而述 八首

李雯 十首

金鎮 五首

陳衍虞 五首

孫廷鐸 四首

江有溶 二首

陳名夏 九首

梁清標 二十首

杜立德 一首

成克鞏 一首

姚文然 三首

朱鼎延 一首

胡統虞 一首

劉肇國 一首

白胤謙 九首

李呈祥 六首

高珩 十二首

史可程 三首

朱嘉徵 十六首

王宏祚 四首

李楷 八首

吳百朋 一首

潘馴 三首

馮如京 七首

晚晴移詩匯卷二十二

徐世昌

趙進美字疑叔一字韞退號清止益都人明崇禎庚辰進士入國朝授太常寺博士歷官福建按察使有清

止閣集

王漁洋曰公少爲詩清真絕俗得王孟之趣使江而時尤刻意二謝其放吟一卷皆樂府詩顧盼跌宕不主故常丙戌後官京師與龔芝麓曹秋岳諸公唱和梨花楓葉諸篇風致不減清邱海叟使楚一集尤爲藝林所貴重

詩話韞退少卽工詩與姜如須宋荔裳陳臥子李舒章宋轅文輩分據南北壇坫遭亂與荔裳避地吳中稱詩服膺滄浪昌穀元美三家分守左江日嘗寓書漁洋論詩漁洋答以詩曰風塵憔悴趙黃門嶺表遷移役夢魂昨見端州書一紙說詩真欲到河源秋谷爲其從孫論其詩謂踐信陽歷下之庭蓋國初諸家多自七子入不獨韞退爲然也

龍泉

惆悵溪橋古樹涼
天涯行李豈能忘
已知山意多秋雨
自聽泉聲到夕陽

夏日范泉

清酒遙尋野樹香
鵝巖煙後漸蒼蒼
十年馬跡慚幽磬
六月蟬鳴在草堂
雨接泉聲搖竹色
雲含日氣作山光
方塘影暗流螢起
繞坐桐陰引夕涼

石門

石門寒色夜冥冥
遠起漁歌越客聽
短棹天涯自惆悵
亂鴉啼過女陽亭

宿興安

徙倚庭階暮苔衣
見履痕月臨官舍
小山帶女牆
尊古木

寒兼雨荒城靜似村天涯傷短髮獨坐對虛樽

賦得楓葉微紅近有霜

郭外西風繞岸斜長林秋靜有啼鴉微寒已入娟娟月遠
色初分澹澹霞千里題書臨白雁重陽疏雨映黃花洞庭
木葉傷心日寂寞懷人在水涯

送宋玉叔還萊陽

長安二月東風迴九門如霧凌晨開鶯花得時自婀娜笳
鼓向暮何啾哀此時重築黃金臺萊陽朱子天下才獻書
至尊賜顏色窮巷不掃公卿來干戈自昔有反覆神物豈
合終蒿萊憶昨飄零逐漁艇夜火荻花對清影一身入世
常坎坷二十爲文最道警懷古蕭條擬過秦開樽感慨歌
哀郢難同年少登石渠稍喜詞人稱畫省意氣何如詩崛

世情頗厭官孤冷白日燕市愁風塵張鐙清夜留故人
我昔結髮與子友十年落魄安居陳江湖擾擾箭滿眼荆
棘月暗生飛燐昭王寢墓羣免走千歲松柏摧爲薪狐裘
貴人光道路衝泥瘦馬何嶙峋尺書遠至妻孥泣投策欲
去僮僕嗔巢父釣竿不肯住彷彿夏雲開島樹靈藥神山
自渺茫海鷗野老非難遇繞陌垂楊黃鳥飛驪歌踟躕送
子歸天涯雙鬢愁搖落海上濁醪無是非

過衛輝宿廢苑

倚棹秋生牧野煙銀牀桂樹憶當年中朝弱弟梁王貴亂
歲詩侯衛叔賢斜日兼葭寒水動孤城風雨女牆懸繞池
修竹猶堪賦無奈啼烏夜燭前

蔡州行

城頭睥睨隱半規斜日欲下懸瓠池欹枕忽聞蔡州角過
眼如閃元和旗憶昔文城夜出甲監軍涕泣大校疑雪片
若掌溼弓劍傳呼問是洄曲兒功成橐韃拜道左緋衣建
節導兩麾迎門婦子笑相語巷犬不吠雞在埭天中之山
地非遠蘗牙百歲生疆隄亦知賜牛盡赤子誰令躍馬驕
王師古來治民若琴瑟絃聲緩促惟所施哀樂須臾視覆
掌治世豈必皆軒羲至今孤城亂後在鶉衣誰子歌百罹
浮雲黯郭孤晝嘯頽垣漏屋侵蒿藜逆旅客過起哀柝舊
畦人歸見旅葵勳名世往終寂寞文章大筆空留垂君不
見荒草已沒丞相廟後人重刻從事碑

度庾嶺數里山勢鬱秀松蘿蒙蔚怪石嵌空苔繡錯

出有作

勞役獲幽賞炎荒慰此行桃花春塢靜松葉石梁清路逐
溪聲得山如人意成晚霞生積翠斜日鳥邊明

述征詩

江勢引征檣山色亦無盡初陽散驚瀾流雲斂餘潤澤國
曠多愁谷風微有信予棹何容與來舟橫一瞬羣力爭亂
石勞歌遞遠韻稍覺蒼翠移方悟川途進攬勝志易更日
遙行不近回沿非歸程旅懷安可問

曉郭下春星江月聞扣舷初辭嶺海目遂覺山川妍宿雲
麗中椒回沙灼清漣天天桃始華岸鳥鳴柔煙羣動順嘉
辰我行方沛然觸類異歡戚道遠情屢遷雙橈漾初日急
瀨搖高天獨謠託遐心浩蕩白鷗前

艣背指石帆更進煙際艇靜聞廣陵鐘春林懸塔影城郭

殊綺麗雲物自清迴曲巷縈柔絲高薨躋朝景娟娟柳覆
陌濛濛花垂嶺鳥飛山氣佳竹抱溪流永雜木雞臺荒殘
霞螢苑冷覽蹟感逝留撫運發深省

露下星未希雞鳴何草草旅夢無端倪征裳亦顛倒登岫
逐落月入林驚棲鳥野風自蕭瑟隴霞漸縹緲忽覺馬首
橫始見龜蒙繞孤村李花明茆屋鵲聲曉居人啟戶觀慰
我萬里道山川易爲遠歲月易爲老局促風塵間安得顏
色好

彭而述字子錢號禹峯鄧州人明崇禎庚辰進士入國
朝歷官廣西布政使有滇黔燕楚諸集

王漁洋曰彭禹峯雄豪磊落陳同甫一流人也詩多
軍中之作如戰壘荒城蒙段外華風邊日漢唐年白
露蠻江彫木葉黃沙羯鼓下營州千盤路吐檳榔鳴
一線天開玳瑁池此例數十句皆有磨盾橫槊之風

詩話禹峯英姿颯爽自負經世之略詩亦稱其爲人
竹垞爲作集序謂人所應有盡有人所應無不必盡
無蓋其縱筆所至不可以常軌繩然近體故多
合作漁洋所舉數聯外披沙揀金往往見寶

雞場別石崑圃

遲暮難爲別相看更一卮他鄉芳草路瘴雨落花時楚國
軍書滿昆明羽檄馳可憐分手處邊月照羅施

資孔驛

到此黔中盡山巔兩樹存香秔叢廢寺茅屋出孤村人語
華番雜蟲聲遠近喧如何馬太史猶未識崑崙

永甯州

纔過雞公背還從象鼻行雲根一寺出石髓亂溪鳴歲月
金錢費關河鐵馬情似聞南詔使廟算欲休兵

衡藩舊邸宴南將軍

又是悲秋日初筵動旅情若能爲楚舞何處得秦聲翠羽
當軒媚紅妝耀日明興亡成底事灑淚忽沾纓

靖州別高將軍

琥珀紅燈醉眼明兩年把臂靖州城天涯尊酒留書劍海
內烽塵老弟兄萬里旌旄猶在望五溪風雨倍含情東西
咫尺蒼梧水握手還期在此行

靖江廢邸同諸君秋集

無情最是此中山閱盡王孫只等閒尙有高臺堪命酒兼
逢勝侶一開顏石鯨薜荔秋蟲出玉螯梧桐野鳥還莫向
西風增感慨漢家樓閣暮雲間

王似鶴按察之中州

弓鳴落日帝城邊節鎮旌旗出使年雪苑寒雲梁殿闕朱

仙父老宋山川十年水旱寒惟裏八郡瘡痍畫戟前聞說
宣房煩璧馬好從河伯問桑田

筇竹寺

六詔彫殘舊戰場青山無恙一松長王孫老去荒祠在頗
耐興亡是夕陽

李雯字舒章江南華亭人明崇禎壬午舉人入國朝官

宏文院撰文中書有蓼齋集

詩話舒章少負才名與彭孝廉賓夏考功允彝陳黃
門子龍周太學立勳徐孝廉孚遠相唱和號雲間六
子鼎革後舒章歸國朝飛書走檄頗著聲
稱相傳睿忠親王致史閣部書即出其手

秋水閣聽客彈瑟

陽崖豁秋陰幽藹散松柏高樓起長眺愁見萬里白有客
攜鳴琴叩絃動清碧彈作瀟湘秋明湖水空液帝子眇何

居楚雲在層壁煙長吳王城高旻壯修翮淒淒鴻雁思清
商岩巖澤

自餘杭歷於潛道中

晨駕辭陰渚逶迤見巖邱芳翠滌餘藹迴沙灼清流洩雲
漫方聚深竹疑晴秋岑巒有連蟬道里無險投紛襲緬騰
舊汨澗搖澄湫楓楮秀中椒薜蘼橫道周青苗濛白水明
疇寫岫陬滄滄水霧滋娟娟微露收白鳥旣輕弱飛鰈亦
緩游旅人從此涉景曜俄然道餘暉滿層峯惆悵靡淹留
雨中舟次靈巖山

飛雨溼迴塘中林藹淒爽高臺蘭葉稀玉砌青苔上彷彿
歌吹音徘徊更興想芳趺長石華鳴榔動清響女蘿何嬋
娟煙虹竟來往香蕪草徑深琴沒離思鞅螭蛄則已鳴雲

寶初未朗輟棹曬層阿懷抱深俯仰

醉月灘懷李白

漸江之水流日夜素車白馬錢塘下我來新都飲練谿十日西干水空大雲雷奔起醉月灘子規五月啼風寒溪花錦石浩無主江上月出青楓間霞散城陽隅鐘鳴興唐寺我家太白高陽徒手綰長風弄清泌逸氣常聯青冥中山高水深異人至自從煙駕歸潯陽崩沙溼霧何茫茫披髮狂歌亦何有大隄楊柳隨風長宣平養真不可問今日雲孫來我傍夜泛彩鷁破澄碧濯足倒景疑瀟湘中椒搖影古殿赤石竹細路吹幽香我行到此步局促丹邱老翁神不揚身騎神驥安所適腰間寶玦誰爲光沙礫猶與人際會丈夫心事多徬徨蛟龍潛宅深水府魚鼈唼喋浮漁梁

風吟雨號安得辨但聞流水聲琅琅太白居我前我生太白後蟠根萬古稱同調勝地同游亦良構將登天都望匡廬煙海濛濛涼清晝朝躡雲中搜白猿暮援蒼藤捫星宿白兮白兮與我俱茅龍羽節來徐徐

大滌山行上黃石齋先生

大滌山南芳草秋風吹薜荔紅泉流先生講堂在空翠明星曉映蒼龍湫中藏寶書石窟幽武夷仗策凝清眸哀然述作動天地山鬼夜叫寒竹愁九重聖人間金匱畫閣蓬池儼相對閭闔門開虎豹疑玉階雲霧當空墜洞霄弟子伏青蒲紫陽真人披素膚長離折翼九苞在葳蕤四海浮雲徂此時草堂猿鶴呼石華紫桂山之隅會稽以南湘江北結蘭紉蕙心躊躇須臾霧捲招搖見下照滄洲滿芳甸

素卷朝看太乙宮鶴書晚下披香殿玉骨乾坤尚可留丹
心日月悲重見山上白雲晝不封先生獨立青芙蓉晚出
已愁鼙鼓急時來不畏旌旗紅赤車白馬馳山東乘輅使
者來恩恩願辭玉杖見天子莫使蒼生望碧空

感秋

遂有矜秋意空庭落小涼晚花濃刺日病葉墮先霜爽動
宜雕鶚驕騰問犬羊郊原最愁寂瀝酒對蒼茫

四海鬱兵氣山川尚有姿登臨及今日幽滯失良期不解
洛生詠能吟豪士詩閉門聊自卧亂石迴相宜

晚意

別墅寒原外孤亭亂木中雜霞停暝色清吹入高桐村靜
砧春急星嚴烏雀通蕭條最無事閒久欲成翁